

Ո Ր Ո Շ ՈՒ Մ թիվ -162
վարչական տույժ նշանակելու մասին

«21» օգոստոս 2020թ.

ք.Երևան

ՀՀ պետական եկամուտների կոմիտեի իրավաբանական վարչության պետ Ա.Մնացականյանս, քննելով Կարապետ Կարապետյանի վերաբերյալ նյութերը.

Պ Ա Ր Զ Ե Ց Ի

2020թ. մայիսի 13-ին ՀՀ ՊԵԿ Արևելյան մաքսատուն-վարչության Բագրատաշենի մաքսային կետ բաժնում զննման է ենթարկվել ՌԴ-ից ՀՀ ժամանած Կարապետ Կարապետյանի կողմից վարվող Renault մակնիշի 937AP61/409L02 պետհամարանիշի կցորդով բեռնատարը, ինչի արդյունքում բեռնատարի քարշակի սրահից հայտնաբերվել է 11,5 կգ քաշով չհայտարարագրված դեղորայք:

Փաստի առթիվ 13.05.2020 թվականին Կարապետ Կարապետյանի նկատմամբ ՀՀ մաքսային օրենսգրքի 203-րդ հոդվածի հատկանիշներով կազմվել է մաքսային կանոնների խախտման վերաբերյալ արձանագրություն, իսկ վերոնշյալ ապրանքները, որպես մաքսային կանոնների խախտման անմիջական օբյեկտ վերցվել և ի պահ են հանձնվել ՀՀ Ուրբան Լոգիստիք Սերվիսիս Տերմինալ>> ՓԲ ընկերության մաքսային հսկողության տարածք:

13.05.2020թ.-ին Կարապետ Կարապետյանը բացատրություն է տվել այն մասին, որ Թբիլիսի քաղաքում իրեն են փոխանցել դեղամիջոցները և խնդրել դրանք փոխանցել այլ անձի:

ՀՀ ներմուծված դեղորայքի շուկայական արժեքը պարզելու նպատակով 21.05.2020թ. նշանակվել է քիմիական և ապրանքագիտական փորձաքննություն, որի կատարումը հանձնարարվել է ՀՀ «Փորձագիտական կենտրոն» պետական ոչ առևտրային կազմակերպությանը:

2020 թվականի հուլիսի 13-ին, ղեկավարվելով «Վարչարարության հիմունքների և վարչական վարույթի մասին» ՀՀ օրենքի 47-րդ հոդվածի 1-րդ մասի «բ» ենթակետով և 4-րդ մասով ՀՀ ՊԵԿ իրավաբանական վարչությունում Կարապետ Կարապետյանի նկատմամբ կայացվել է վարչական վարույթի ժամկետը երկարաձգելու մասին որոշում:

ՀՀ «Փորձագիտական կենտրոն» պետական ոչ առևտրային կազմակերպության փորձագետի 07.08.2020թ. թիվ 14442005 եզրակացության համաձայն՝ փորձաքննությանը ներկայացված 13 անուն դեղորայքից 5 անուն դեղորայքի շուկայական արժեքը 2020 թվականի մայիսի 13-ի դրությամբ կարող էր կազմել 880200 ՀՀ դրամ, իսկ 8 անուն դեղորայքը չի գնահատվել փորձագետի կողմից՝ ՀՀ ում գրանցված չլինելու պատճառով:

ՀՀ ՊԵԿ մաքսային հսկողության վարչության 21.08.2020թ. գրության համաձայն՝ 13.05.2020թ. դրությամբ ՀՀ ներմուծված դեղորայքի մաքսային արժեքը կազմել է 719118 ՀՀ դրամ (մաքսատուրք՝ 14382 ՀՀ դրամ, ԱԱՀ 146700 ՀՀ դրամ): Նշվել է նաև, որ դեղորայքի ներմուծման դեպքում կիրառվում են ոչ սակագնային կարգավորման միջոցներ:

Վարչական վարույթի շրջանակներում Արարատի մարզ, գ. Դաշտավան, Պ.Սևակի փ տնակ 29 հասցեով ծանուցագրեր է ուղարկվել Կարապետ Կարապետյանին՝ վարչական վարույթին և գործի քննությանը մասնակցելու համար, սակայն ծանուցագրերը վերադարձվել են՝ <<տեղափոխված>> նշագրմամբ:

Համաձայն ՀՀ ոստիկանության անձնագրային և վիզաների վարչության գրության՝ Կարապետ Կարապետյանը հաշվառված է Արարատի մարզ, գ. Դաշտավան, Պ.Սևակի փողոց տնակ 29 հասցեում:

Եվրասիական տնտեսական միության մաքսային օրենսգրքի/ այսուհետ նաև Օրենսգիրք/ 9-րդ հոդվածի համաձայն՝ Միության մաքսային սահմանով տեղափոխվող ապրանքները ենթակա են մաքսային հսկողության՝ սույն Օրենսգրքին համապատասխան: Օրենսգրքի 104-րդ հոդվածի համաձայն՝ ապրանքները ենթակա են մաքսային հայտարարագրման դրանք մաքսային ընթացակարգով ձևակերպելու կամ սույն Օրենսգրքին համապատասխան սահմանված այլ դեպքերում: Օրենսգրքի 2-րդ հոդվածի 1-ին մասի 35-րդ կետի համաձայն՝ մաքսային հայտարարագրում է համարվում՝ մաքսային մարմնում մաքսային հայտարարագրի միջոցով ապրանքների վերաբերյալ տեղեկությունների, ընտրված մաքսային ընթացակարգի վերաբերյալ և (կամ) ապրանքների բացթողման համար անհրաժեշտ այլ տեղեկությունների հայտարարագրումը: Օրենսգրքի 2-րդ հոդվածի 1-ին մասի 32-րդ կետի համաձայն՝ մաքսային հայտարարագիր է համարվում՝ մաքսային փաստաթուղթը, որը պարունակում է տեղեկություններ ապրանքների վերաբերյալ կամ ապրանքների բացթողման համար անհրաժեշտ այլ տեղեկություններ:

Օրենսգրքի 2-րդ հոդվածի 10-րդ կետի համաձայն՝ «արգելքներն ու սահմանափակումներն»՝ Միության մաքսային սահմանով տեղափոխվող ապրանքների նկատմամբ կիրառվող ոչ սակագնային կարգավորման միջոցներ են:

«Եվրասիական տնտեսական միության մասին» պայմանագրի 46-րդ հոդվածով սահմանված են ոչ սակագնային կարգավորման միջոցները, այն է. «Երրորդ երկրների հետ առևտրում Միության կողմից ընդունվում են ոչ սակագնային կարգավորման հետևյալ միջոցները՝ 1) ապրանքների ներմուծման և (կամ) արտահանման արգելք, 2) ապրանքների ներմուծման և (կամ) արտահանման քանակական սահմանափակումներ, 3) ապրանքների ներմուծման և (կամ) արտահանման բացառիկ իրավունք, 4) ապրանքների ներմուծման և (կամ) արտահանման ավտոմատ լիցենզավորում (հսկում), 5) ապրանքների ներմուծման և (կամ) արտահանման թույլատրական կարգ»:

Դեղորայքն ընդգրկված է ԵՏՀ կոլեգիայի 21.04.2015թ. թիվ 30 որոշմամբ սահմանված սահմանափակումների ենթակա ապրանքների միասնական ցանկում (կետ 2.14):

Օրենսգրքի 12-րդ հոդվածի 3-րդ մասի համաձայն՝ միության մաքսային տարածք ապրանքների ժամանման կամ Միության մաքսային տարածքից ապրանքների մեկնման ժամանակ համապատասխան արգելքների եւ սահմանափակումների չպահպանման դեպքեր հայտնաբերելու դեպքում մաքսային մարմինը որոշում է ընդունում Միության մաքսային տարածք ապրանքների ներմուծումը կամ Միության մաքսային տարածքից ապրանքների արտահանումն արգելելու մասին և դրա մասին տեղեկացնում է փոխադրողին, իսկ նրա բացակայության դեպքում՝ Միության մաքսային տարածք ապրանքների ներմուծման կամ Միության մաքսային տարածքից ապրանքների արտահանման պահին այդ ապրանքները տիրապետելու, օգտագործելու և (կամ) տնօրինելու իրավունք ունեցող անձին:

Օրենսգրքի 12-րդ հոդվածի 4-րդ կետի համաձայն՝ արգելքների եւ սահմանափակումների պահպանումը միության մաքսային սահմանով ապրանքներ տեղափոխելիս, միության մաքսային տարածք ապրանքների ներմուծումն արգելելու մասին մաքսային մարմնի որոշումն ստանալուց հետո միության մաքսային տարածքից անհապաղ արտահանելու անհնարինության դեպքում այդպիսի ապրանքներն արգելանքի են վերցվում (արգելապահվում են) մաքսային մարմնի կողմից՝ սույն Օրենսգրքի 51-րդ գլխին համապատասխան:

ՀՀ կառավարության 28.02.2019թ. թիվ 202-Ն որոշման 4-րդ կետի համաձայն՝ դեղագործական արտադրանքը ՀՀ է ներմուծվում ՀՀ առողջապահության նախարարության կողմից տրված ներմուծման հավաստագրի հիման:

ՀՀ մաքսային օրենսգրքի 189-րդ հոդվածի 1-ին և 2-րդ մասերի համաձայն՝ մաքսային կանոնների խախտում է համարվում անձի կողմից կատարված անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության մաքսային սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն: Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

ՀՀ մաքսային օրենսգրքի 203-րդ հոդվածի 1-ին մասի 3-րդ պարբերության համաձայն՝ Հայաստանի Հանրապետության մաքսային սահմանով տեղափոխվող ապրանքները և տրանսպորտային միջոցները չհայտարարագրելը կամ ոչ իրենց անվանմամբ հայտարարագրելը կամ հայտարարագրման ժամանակ ոչ ճշգրիտ տեղեկություններ նշելը, որն առաջացնում է ոչ սակագնային կարգավորման միջոցների չկիրառում՝ հանցագործության հատկանիշների բացակայության դեպքում՝ առաջացնում է տուգանքի նշանակում՝ այդ ապրանքների և տրանսպորտային միջոցների մաքսային արժեքի չափով:

Կարապետ Կարապետյանը ծանուցվել է գործի քննության վայրի և ժամանակի մասին, սակայն չի ներկայացել, առարկություններ, դիտողություններ չի ներկայացրել և գործի քննությունը կատարվել է նրա բացակայությամբ՝ հիմք ընդունելով ՀՀ մաքսային օրենսգրքի 219-րդ հոդվածի 2-րդ մասը որի համաձայն՝ գործը կարող է քննվել նաև տվյալ անձի բացակայության դեպքում, եթե անձը բացակայում է, և հայտնի չէ նրա գտնվելու վայրը:

Այսպիսով, նյութերով պարզվել է, որ 2020 թվականի մայիսի 13-ին ՀՀ քաղաքացի Կարապետ Կարապետյանը առանց հայտարարագրման ՀՀ մաքսային սահմանով տեղափոխել է 719118 ՀՀ դրամ մաքսային արժեքով 11,5 կգ դեղորայք, ինչի հետևանքով դրանց համար չեն կիրառվել ոչ սակագնային կարգավորման միջոցներ, այսինքն՝ Կարապետ Կարապետյանը թույլ է տվել ՀՀ մաքսային օրենսգրքի 203-րդ հոդված 1-ին մասի 3-րդ պարբերությամբ նախատեսված մաքսային կանոնների խախտում, ինչը հիմնավորվում է՝ մաքսային կանոնների խախտման վերաբերյալ կազմված արձանագրությամբ, Կարապետ Կարապետյանի բացատրությամբ, ՀՀ «Փորձագիտական կենտրոն» պետական ոչ առևտրային կազմակերպության փորձագետի 07.08.2020թ. թիվ 14442005 եզրակացությամբ և ՀՀ ՊԵԿ մաքսային հսկողության վարչության 21.08.2020թ. գրությամբ:

Վերոգրյալի հիման վրա և ղեկավարվելով ՀՀ մաքսային օրենսգրքի 203-րդ հոդվածով, 206-րդ և 221-րդ հոդվածներով,

Ո Ր Ո Շ Ե Ց Ի՝

1. Կարապետ Կարապետյանին (ծնված՝ 05.11.1990թ., բնակվող՝ Արարատի մարզ, գ. Դաշտավան, Պ. Սևակի փ տնակ 29, անձնագիր AS0649779) ճանաչել զանցառու ՀՀ մաքսային օրենսգրքի 203-րդ հոդվածի 1-ին մասի 3-րդ պարբերությամբ և նրան տուգանել՝ 719118 ՀՀ դրամի չափով:


/վճարումը 900005024055 (կող-19) հաշվեհամարին/

2. Արգելապահել 07.08.2020թ. թիվ 14442005 եզրակացության մեջ նշված՝ ՀՀ-ում չգրանցված 8 անուն դեղորայքը:

3.ԵԱՏՄ Մաքսային օրենսգրքի 98-րդ հոդվածի 4-րդ մասի համաձայն որոշումն ուժի մեջ մտնելու օրվան հաջորդող օրվանից ոչ ուշ, քան 10 օրացուցային օրվա ընթացքում վերցված ապրանքները պետք է հանձնվեն ժամանակավոր պահպանման:

4.ՀՀ մաքսային օրենսգրքի 221-րդ հոդվածի համաձայն՝ որոշումն ուժի մեջ է մտնում կայացման պահից և Վարչարարության հիմունքների և վարչական վարույթի մասին ՀՀ օրենքի 71 հոդվածի համաձայն՝ 2 ամսվա ընթացքում կարող է բողոքարկվել վերադաս մաքսային մարմին կամ ՀՀ վարչական դատավարության օրենսգրքի 72-րդ հոդվածի 1-ին մասին 1-ին կետի համաձայն՝ 2 ամսվա ընթացքում ՀՀ վարչական դատարան:

ԻՐԱՎԱԲԱՆԱԿԱՆ
ՎԱՐՉՈՒԹՅԱՆ ՊԵՏ



Ա. ՄՆԱՑԱԿԱՆՅԱՆ